

# 《War for God》

作者: 奧比旺

Powered by [紙言](#)

# Ch.1

這天，是長沙灣基道教會的聖誕聚餐日，許多長沙灣的街坊都來到教會裡參與這一年一度的福音聚餐。

「哈囉！梁伯你都嚟咗啊？」

「喂！咁啱嘅唐師奶！」

「係啊，我睇到常議員嘅宣傳，所以咪知今日教會今日有聖誕party囉！」

「緊係啦！有免費嘢食，仲要係常議員請嘅添！請可以唔俾面啊？」

「不過講起常議員呢，佢真係好好人㗎！全靠佢幫我個仔出頭，先告得入嗰班恰我個仔嘅衰人咋！」

「點止啊，常議員仲幫我哋嗰座舊樓翻新一次，等我哋呢啲老人家有搭，唔駛再撐樓梯咁辛苦！唔似得嗰班黑衫『甲由』，除咗識得掙磚、掙汽油彈之外仲識得啲咩姐！？把口就講『光復香港』！但現實呢？咪就係喺度破壞香港！」

「係囉！佢哋點會似得常議員佢咁用心出力咁服務我哋呢啲小市民啊！」

「喂，睇吓！常議員到咗喇！」

一名身穿著白色西裝外套、西褲，黑色恤衫、打著紅色領帶的男子走進教會 - 他有著一個高高的鼻樑以及深深的輪廓，一看就知道不是一位亞洲人。

「各位長沙灣嘅街坊大家好！今日盡情食！唔駛客氣！」

「阿義！」一對年輕、打扮新潮的夫婦走向為義。

「林牧師、林師母！」為義跑到二人的面前。

「估唔到今次班年輕人一個都無嚟到....」林師母臉帶愁容。

「哦，可能佢哋有其他節目呢！你哋知㗎啦，時下啲年輕人一到長假期就互相約晒出嚟玩、周圍飲食。」

「但佢哋每年嘅聖誕聚餐都一定會出現，今次真係有啲唔對路....」林牧師皺起眉頭，摸著下巴。

此時，一班身穿黑色衫褲、戴著口罩的年輕男女由街口走到教會的大門前，他們雙手舉著寫有「偽善中立者」、「你不代表年輕人」的標語牌，口裡一致地高聲喊著：「常狗可恥！埋沒良心！」

教會內的人紛紛停止進食，來到教會的大門前與示威者們對峙。

「走啦！呢度唔歡迎你哋啊！」

「咪阻住我哋開餐啦！」

越來越多的街坊指罵示威者們，而示威者們亦與街坊展開對罵。

「等我嚟！」為義跑到雙方的中間。

為義嘻皮笑臉地說：「唔係唔俾面我哋大佬蘇哥啊嘛？搞寸佢一年一度嘅生日會！？」

示威者裡有其中一個人走到為義面前，怒吼著說：「你叫佢跳落嚟啊笨！」

「既然係都要玩啊嘛，好，我就姑且陪你一陣。」說罷，為義從褲袋裡拿出手提電話操作一番。

「報警啊撻樣！」

「唔報正契弟！」

為義把電話收起後，望向街口說：「Hello! Every we have a trouble! They don't like my lord Jesus. They want to destory our Christmas party! So what can i do!？」

「你噏乜英文啊常狗！」

「我有話過噏俾你哋聽咩？」

此時，有一位身穿黃色反光衣、胸前帶記者證的印度裔的少年提著攝錄機，由街口緩緩步向教會。

「喺，宜家就直播緊嘅，如果你哋覺得搞串我哋大佬個生日party係會對你哋國際戰線有幫助嘅話咪繼續囉！」為義擺出一副輕挑嘅嘴臉。

示威者們沉默片刻，然後逐漸散去。

當人群散去後，為義對身後的人高聲喊道：「各位可以繼續食嘢喇！」

「嚇死我啊真係....」為義替阿星拿著攝錄機，阿星便脫下反光衣以及記者證。

「一齊嚟食嘢啦，你都企咗成個朝頭早喇。」

「喺，我俾面大佬你咋！你知我哋啲穆斯林㗎啦！」

「得啦、得啦！知你俾面喇！」為義拍著阿星的肩膀，與他一起走進教會。

聚餐結束後，為義和阿星向林牧師夫婦道別後，便離開教會。

「大佬，」阿星在為義的耳邊輕聲地說：「班友點解會走嚟搞鳩你嘅？」

「選舉近了，想踢我出局加落我面啊嘛。」

「屌，真係無鳩聊！」

「因為佢哋只係想推翻政權，而我，係想改變成個香港....呢一個腐敗同扭曲嘅垃圾城市！唔by佢哋個套嘅自然就變成佢哋嘅敵人㗎喇....」

此時，突然有一名中年男人走向為義二人。

「常議員！你個辦事處出咗事喇！」

為義二人馬上跟著那男人來為義的議員辦事處 - 阿星走近那道已經被淋上紅色油漆的大門，口裡中暗暗罵了一句：「What the fuck....」

在大門旁邊的壁報板亦被人用黑色噴漆噴上「常狗落地獄」、「偽中立者死」等字句，而在大門上那印有為義肖像的宣傳橫額亦被塗鴉和剪爛。

「好在我喺道門上落咗重本姐....」為義走近大門，將自己雙眼靠近門鎖。

「Welcome to back.」

門就開了。

為義走進門後，第一件事就是打開燈。

「大佬，點算啊？」

為義沉思一會，說：「叫晒大家過嚟。」

待續

## Ch.2

「宜家？」

「唔通聽朝啊？」

說罷，為義拿出手提電話拍攝一番。

「WhatsApp俾家俊佢咁。」

阿星拿出自己的手提電話，在一個名為「救港騎士團」的WhatsApp群組裡發表為義的吩咐。

十分鐘後，一名身材高瘦，皮膚白皙且眉清目秀的少年來到為義的辦事處。

「哇！班友真係嚟料啊！？」那少年見到一片狼藉的景象，登時瞪大雙眼。

「子軒，家俊呢？」

「佢唔舒服，所以無嚟。」

「嗯，咁入嚟啦。」為義領著二人走進室內，並重新鎖起大門。

「大佬，係唔係要郁手喇？」

「係囉，竇都已經俾人踢埋喇喎！」

「我正正就係想同大家講我哋要更加戒急用忍，忍辱負重。」

「仲忍？」阿星瞪大雙眼。

「你估我哋宜家派人斬佢哋老母之後我哋會吸引到更多人支持啊？到時我哋盞穿幫㗎咋！唔好唔記得我哋養咗成隊兵喺手，一旦曝光咗我哋個plan就會正式收皮！」

「咁唔通由得班友恰到我哋上心口咯喎！？」

「總之我哋繼續練兵，他朝一日一定有機會翻身....反正班差佬都頂唔到幾耐....遲早有一日班示威者同主流狗都會奪到權....到時班弱勢嘅人就會徹底玩撻完....」

整個空間的氣氛頓時沉重起來。

「總之我哋一定有機會還拖，但唔會係今日。」為義走向酒櫃，拿出一瓶紅酒和三隻酒杯。

再為自己以及子軒二人倒酒：「嚟，飲完呢杯酒之後就開工，清理番好個場去。」

三人把酒一飲而盡後，為義便走進廁所並關起門來。數秒後，為義手裡拿著一桶海藍色的液體和三條毛巾走出廁所。

「開工！」

正當為義打開大門時就見到十多名記者已在門外恭候著他。

「常議員，你點睇今次嘅破壞事件？」

「常議員，你認為今次嘅幕後黑手係邊個？」

為義將水桶和毛巾放在一旁，整理好衣領、梳理好頭髮，便開始回答記者的提問：「哪怕有幾多嘅阻撓，我哋依然會堅持服務人群、搞好呢個香港。我唔理係邊個組織指示或者邊個人做。我只會同佢講一句，我哋係唔會退縮。」

網上流傳今次嘅破壞事件係同你近日組織『弱勢社群自衛隊』以及『社會改革』論有關，請問你有咩睇法？」

「如果喺呢個咁嘅時勢弱勢社群連保護自己嘅權利都無嘅話，咁仲講咩民主、自由、人權啊？除非大家同我講弱勢社群唔係人，唔受人權嘅保障姐。同理如果大家覺得香港呢個社會無問題嘅話咪繼續囉，反正到時成個香港依然都係不快樂城市、不宜居住城市，到時有咩事發生嘅話唔好嚟搵我。」

「常議員，你擔唔擔心訪問出咗街之後會有更多針對你嘅破壞事件？」

「即管嚟，只要唔好傷害到任何人就得㗎喇。死物姐，有咩所謂？」

此時，為義的手提電話傳來震動，為義看了來電顯示後便對記者們說：「我有啲緊要嘢要做，失陪喇各位記者朋友。」

說罷，為義轉身走入辦事處並關上大門，阿星和子軒則替為義應付記者們。

「喂，啊義，聽講班『甲由』搞你個辦事處嗰，點啊？駛唔駛叫啲伙記嚟幫你手啊？」

「多謝一哥，有心喇。呢壇嘢我同我班会拆掂佢㗎喇。」

「喺，唔好話我唔提醒你啊，我就收到風，班『甲由』會喺下個禮拜二除夕夜嗰晚有行動，到時你自己執生啦！」

「收到喇。」

「咁我就去開會先喇，你自己慢慢啦吓。」

通話結束後，為義再次走出大門，發現記者們早已離開，而現場只有子軒一人。

「阿星呢？」

「去咗廁所囉 - 話時話頭，頭先邊個打俾你啊？」

「一哥囉，仲會有邊個姐。」 「佢講咗啲咩啊？」 「話下禮拜二有大獲嘢姐....」

子軒朝為義的耳邊靠攏，輕聲地問道：「咁即係我哋係咪可以出動喇？」

「你話呢？」

說罷，為義便開始清潔大門。

「咋咋林做完就去食下午茶啦！」為義將毛巾丟給子軒，子軒接到手後亦加入清潔工作。

「咦？又會一吓就擦得甩嘅？有無咁勁啊啲洗潔精。」

「因為我加咗料啊嘛！哈哈！」為義沾沾自喜地說。

就這樣，子軒和為義二人不出三分鐘就把大門上的紅色油漆和壁報版上的塗鴉都抹掉。

「阿星，番到嚟喇。」 「Sorry大佬，頭先飲得太多汽水。」 「唔緊要，最緊要肯番嚟。」

為義從辦事處裡拿出一條人字梯放在橫額下。

「阿星，睇你喇！」

「收到大佬！」

阿星爬上樓梯，小心翼翼地將橫額拿下來。

「搞掂食碗麵！去high tea！」為義搭著二人的肩膀。

待續

## Ch.3

為義領著二人走進茶餐廳，就馬上有人前去招呼。

「常議員！請坐、請坐！」

「我照舊，其他嘅你哋自己喊。」

「西多士、凍檸茶少甜。」子軒說。

「我都係！」阿星舉起左手。

當三人都安坐下來後，便將注意力轉移向餐廳內的電視機。

電視機裡正播映著最受香港市民歡迎的清談節目 - 「你有理講」，而今天的節目嘉賓正是最受全港市民歡迎、備受影視界人仕敬重以及愛戴的女名嘴，Karen Cheung。

「我哋今日好歡迎請到Karen姐嚟到我哋嘅節目度，歡迎妳啊Karen姐！」

「又係呢條死八婆....」子軒低聲地罵道。

「一見到佢個閻樣就想打柒佢！」阿星向著電視螢幕掄起拳頭。

「聽講妳最近對香港時局都有啲心得想同大家分享吓啫！」

「無錯，除咗五大訴求之外，我更加支持將所有唔合社會指標嘅弱者都趕出呢座城市，即係汰弱留強。事關呢個係我哋人類自古以嚟嘅延續方式，亦係唯一能夠令香港再次發光發熱嘅方法。我先唔似得某啲打著保護弱勢嘅旗號、走嚟拖呢座城市後腿嘅傻人咁，為咗虛名而斷送美好嘅將來！」

「大佬！佢串你啫！」阿星指著電視螢幕。

為義皺起眉頭，拿起侍應剛放下的那杯奶茶並且喝了一口。

「呢啲咁嘅人唔駛理佢，反正我哋贏咗之後，自自然然就會自動收皮....好似佢呢啲個腦裡面只係得『價值』嘅人，最鐘意就係見風使舵。」

「但佢啲論點又真係難駁嘅....」子軒將糖漿淋在西多士上。

為義再喝多一口奶茶，回答說：「放心，終有一日佢所講嘅嘢，會徹徹底底咁變成一個笑話。」

「因為喺佢哋嘅眼中，只會識得將一百蚊當喺一百蚊咁駛。而我，就識得將一百蚊變成一千蚊、再將一千蚊變成一萬蚊！」

阿星一臉好奇地問：「咁個方法係點啊？」



「呢一層呢....」為義把手阿星的肩膀上，向阿星擺出一個親切的微笑。「到時我哋成功咗之後你自然就會知㗎喇。」

「屌！講呢啲！」

為義以滑稽且猥瑣的笑聲應付阿星的埋怨。

「快啲食啦你哋！啲嘢就嚟涼晒喇！」三人吃完下午茶後由為義結帳。

「大家返歸啦吓！記得唔好熱血上腦啊！」

為義離開二人後，便回到自己位於柯士甸西的家，新落成一個月有多的頂級豪宅 - 匯豪門。

為義甫入家門，便見到自己的父母迎向自己。

「爸爸羊、媽媽羊，小羊番嚟喇。」

「小羊羊食咗飯未啊？」為義的母親問道。

「食咗喇，宜家要去訓教教豬喇，聽日大把嘢要做啊。」

「加油喇。」為義的父親笑著說。

為義走進自己的睡房後便鎖起門來，他打開檯燈和電腦，開始瀏覽一個名為「LIHKG」的網站。

他按進「時事台」，發現大量幸災樂禍的帖文，其中有些帖文更加鼓吹發起第二次針對自己的行動。

「哼，好笑。」

為義見沒有任何有價值的帖文後，便關掉電腦。

「好，又係要開工時間喇喂....」

為義脫去自己的西裝和皮鞋後，把窗戶打開。

「我變！」

為義轉一轉身，居然可以變成一隻麻雀！

他張開雙翼，飛出窗外。

「去咗老蘭先....」

為義飛向全香港最熱鬧的夜蒲點 - 蘭桂芳。

他剛到步就發現兩名男子將一名已經醉倒的女子帶上一輛計程車，他立刻再變成一隻蚊飛進計程車裡。

「唔該司機，時鐘酒店啊。」

「哼，一早就估到你哋想點啦！」為義心想。

當計程車抵達目的地後，為義馬上附在其中一人的衣服上，待他們進到酒店房間後，為義這次變成一隻銀背大猩猩，當場把那兩名男子打到不省人事。

「等我幫你返屋企先....」

為義抱起那女子，乘搭電梯去到地下大堂。

「幫個女仔叫白車！」

為義把女子放下，在酒店職員驚訝的神情下乘搭電梯回到剛才的房內變回蚊子。

「繼續巡邏啦喂！」

待續

## Ch.4

直到天亮為止，為義足足拯救了十位女子。

「係時候返歸喇喂！」

為義回到家後第一件事就是全身梳洗，他梳洗完後就換上西裝，檢查手提電話裡的訊息。

「好在你班友仔都聽勸姐....」

為義收好手機，便步出房門。

「小羊羊訓醒喇？」

為義的母親獨自一人在大廳打地鋪。

「係啊，我宜家落去霸位，你同爸爸羊陣間落嚟啊。」

為義步出家門，來到他們一家平常光顧的酒樓。

「常議員早晨！」

「早晨啊經理！照舊三位。」

為義坐下來後，用熱水清洗茶杯以及餐具的同時，在電視機上欣賞新聞報導員報導自己昨晚的「傑作」。

此時，為義的父母來到為義所在的桌子。

「小羊羊，媽媽同爸爸嚟囉。」

為義為二人倒茶，便開始點菜。

「啊仔你幾時先帶個女朋友番嚟啊？」

「唔喇，我大把嘢做，無心情理呢啲嘢住。」為義喝了一口茶。

「你都shot  
shot咁嘅！我哋仔仔宜家堂堂一個區議員啊，大把女仔追啦！駛咩咁急姐。係咪啊？」

為義沒有回答自己父親的問題。

「不過小羊羊你去土耳其讀書讀咗一年，就賺到一筆錢開咗間藥廠，番到嚟香港仲做埋議員！真係好本事，到底你睇土耳其個度做咗啲咩啊？」

「呢一層啊....」為義放下茶杯。

「因為我識咗個有錢朋友囉！跟住仲 - 」

「咦！你睇吓係邊個！？」

突然，有五名戴著口罩的男女圍著為義三人。

「係常狗啊喂！大家埋嚟睇吓狗喇喂！」

「你班廢人咪撻阻住我哋飲茶啦！」為義的父親拍枱大罵。

為義亦馬上站起身來，對五人說：「你要玩嘢嘅話，我一定奉陪，但唔係今日。」

「點啊！？凶我啊宜家！？」

有食客挺身而出，指罵男女們：「走啦死甲由！唔好阻住常議員同屋企人飲茶啦！」

「走啦！呢度唔歡迎你哋啊！」

越來越多的食客，甚至連酒樓的工作人員也加入戰團，那五名男女見狀，便撤離現場。

「有我哋喺度，你哋唔駛驚！」

「多謝黃伯同咁多位！小弟實在受寵若驚！」

「不過話時話喇，班友仔又點會知你嚟開呢度同老豆老母飲茶嘅？」

為義頓了一頓，似乎發現了一些很重要的事。

「可能佢哋見過我掛！唔知呢？算啦，呢啲嘢唔好理住喇，食咗嘢先啊。」

為義與父母進膳完後，便送父母回家。

「仔仔你要小心啲啊！班黑衣幫無性㗎....」

「得㗎喇，我有分數....你哋返屋企先啦，我仲要去做嘢。」

為義離開父母後，便前往一座位於新蒲崗的工廠大廈。

為義到達最頂層，來到其中一個單位前按門鐘，有人前來應門。

「大佬你嚟咗喇？」應門者正是家俊。

「佢哋搞成點啊？」

他一進入室內，便見到阿星與子軒正在操練一群人，當中有外表身材皆平庸甚至不符社會標準的男性、南亞人以及黑人，他們皆手持長達三米的竹竿，不斷重複向前刺這動作。

家俊一臉抱歉地說：「尋日我腸胃炎發作，嚟唔到添。」

「算啦，只要你有嚟操兵就得嫁喇！」為義拍一拍家俊的肩膀。

子軒發現為義來到後，便高聲喊著說：「大家休息一陣！陣間再練！」

「大佬，你臉色好似唔幾好咁？」阿星問道。

「當你知道自己俾人起完底之後，你自然會知咩一回事。」為義將剛才在酒樓裡發生的事告訴給家俊他們。

「屌....班友又會咁撚賤嘅....」阿星罵道。

「你哋自己都要小心啲啊！記得唔俾自己同埋班手足見光死啊！到時真係一鑊熟㗎！」

「放心啦大佬，我哋有分數㗎喇。」子軒搭著為義的肩膀。

「係喇，話說啲『日本貨』嚟咗未啊？」

「今朝早到咗。」家俊嘴角上揚。

「Good....帶我去睇吓！」

家俊便領著為義等人來到一間放滿紙皮箱的房間內，他打開其中一個紙皮箱，從箱內取出一把武士刀給為義。

為義拔刀出鞘，仔細地觀察被燈光照得閃閃發亮的刀身。

「好刀....好刀....果然無哋到我啊....好！遲吓我會親自教班兄弟練刀！」

「好嘢啊大佬！到時候肯定可以斬到班主流狗全黨死清光！」阿星拍手掌。

「有咗呢啲刀，我哋簡直如虎添翼啊！」子軒流露出燦爛的笑容。

「所以咪話咗我哋要戒急用忍囉，如果我哋一露出馬腳，到時啲刀俾人周到晒嘅話我哋用啲咩嚟起義啊？用手指啊？」為義收刀入鞘，再放回箱內。

「不過話時話啊，宜家連登班友吹晒雞，話下禮拜除夕會有大嘢搞，聽講仲要係十八區一齊嚟料添！」

「我同阿星哋尋日就知啦。」

「不過連登啲料detail啊嘛，佢哋仲話終局一戰，甚至有人仲post埋遺書添！真係唔惹小㗎！」

為義沉思了一會，說：「就算佢哋係搞都好，都應該惡唔出咩樣㗎喇，嗰日大家都係好地地咁放假、陪吓屋企人啦！」

此時，有一名男子突然衝入房內，慌張地說：「門外有條著住反光衣、帶住記者證嘅女啊！」

待續

## Ch.5

「等我嚟。」

為義在那男子的耳邊輕輕吩咐幾句後就步出房間，親自應門。

「請問有咩貴幹啊小姐？」

「你好常議員，我係太空日報嘅記者。我係嚟想採訪一吓常議員同你身後嘅地方，請問你方唔方便？」

為義留意到那名女子手裡提著一部攝錄機。

「好啊，儘管入嚟。」

為義讓開後，女記者第一眼就見到單位內全是全身赤裸、對著她露出猥瑣笑容的男性，嚇得她當堂尖叫一聲。

「哎呀！爭啲唔記得同妳講，我哋呢度係仿古希臘風嘅武術班....無嚇親妳啊嘛？」

「多謝常議員，我諗今日嘅採訪都係暫時結束。」說罷，便轉身離去。

「死八婆....同我玩！？未夠班啊你！」為義轉身對著自己的部下們說：「大家可以著番衫褲喇！」

眾人無不歡呼。

「啲女仔一見親除自己條仔以外嘅崩周自然就會落荒而逃㗎啦！尤其是兄弟們嘅嗰度咁大揪！」為義一邊猥瑣地笑著，一邊梳理著自己髮型。

「大佬果然係大佬！」阿星拍掌。

「不過條女咁都攞到上嚟....大佬，我諗你已經俾人跟蹤緊！」子軒說。

「睇嚟班友真係玩到好盡....」家俊摸著下巴說。

「無計啦，鬼叫我尋日個訪問咁具挑釁性咩....總之大家小心啲啦！」說罷，為義辭別眾人後便離開練武場。

當為義走到樓下時，他的手提電話便響起來。

「家明？做咩啊？又唔開心啊？」

「嗯....我今日俾同學笑啊....」

「咁啊....不如我嚟搵你，同你傾吓啊！」

「好啊....」

「去番上次嗰間茶餐廳啦，好無啊？」

「嗯....」

為義來到茶餐廳後，便見到一位身穿校服的男孩獨自坐在角落，為義便馬上走向他。

「家明！係我啊！」為義坐在他的對面。

「義哥哥，今日啲同學笑我打機又唔叻、讀書又唔叻，做人做好鬼渣啊....」

「哦，原來係咁....」

「義哥哥啊，做人係咪一定要叻先得㗎....？」

「邊個話㗎！？係邊個話做人一定要叻先得㗎！？叫佢出嚟！等我送樣嘢俾佢！」說罷，為義將雙手放在桌上，然後豎起兩隻中指。

「如果以後再有人想你叻嘅話，你就記得送呢樣嘢俾佢！Ok？」

「呢樣嘢係咩嚟㗎？」

「係專門送俾衰人嘅嘢。」

「咁送完之後會點㗎？」

「佢哋自然就會收聲。」

「咁如果佢哋都係唔肯呢？」

「咁嘅話就....」為義收回雙手。「我哋食咗嘢先啦！」

為義招來侍應，為自己和家明點餐。

「我就照舊。」

「我要C餐。」

為義與家明共進午餐後，便護送家明回家。

「義哥哥啊，香港係咪永遠都唔會有改變㗎？」

「我應承你！」為義緊緊地捉住家明的雙手。

「我一定會建立一個唔單止屬於叻人、正常人嘅香港！就算係唔叻嘅人都好，都要一齊享福！如果



有人夠膽阻住我嘅話，我一定會搞掂佢！」

「真係嘅？」

「真！到時候，香港會係一個好快樂嘅地方！」

為義右手握緊拳頭，放在自己的左胸上。

「嗯，我一定會支持你！」

「多謝你，bye bye！」為義目送家明進入大廈的大堂。

此時，為義的手提電話傳來震動。

「喂？子軒，做咩啊？」

「大佬，我收到風，立會聽日要開會。」

「又會咁急....知唔知係咩會啊？」

「咁就唔知，我都係聽我daddy講嘅，事關佢頭先同班高官食完飯嚟。」

「咁好啦，唔該晒你。」

為義掛掉通話後，返回自己的辦事處，當他步入門後便接到第二個來電，正是警務處處長。

「啊義，聽日有個會啊，到時會傾吓『緊急法』啲嘢，你睇吓你到時點啦吓！」

「唔係嘛，玩到咁盡？」

「啊爺落咗order，話呢個月內就要搞掂班甲由！」

「佢哋未免太天真啊嘛....」

「鬼知佢哋咩！雖然我知道你不嬲就中立嘅，但喺官場，有時又真係唔到你話事嘅....總之你聽日自己執生啦吓！我去同班細仲有漁護處啲友傾吓點捉尋晚嗰隻救女猩猩先....係咁啦！」

結束通話後，為義把電話放在辦公桌桌面，然後陷入沉思之中。

「呢次真係仆街了....」

為義走向酒櫃，倒了一大杯紅酒。

待續